

ՀԱՄԱԳՈՐԾԱԿՑԱՅԻՆ ՈՒՍՈՒՑՄԱՆ ՄԵԹՈԴՆԵՐ

Ստորև բերված են համագործակցային ուսուցման մի քանի մեթոդ, որոնք օգտագործվել են թեմատիկ պլանավորման դասերի պլաններում՝ առանց մեկնաբանության: Այս հավելվածում ներկայացված մեթոդների նկարագրությունը ուսուցչին հնարավորություն կտա կիրառել իր նախընտրելի մեթոդը կամ համոզվել, որ ներկայացվածն առավել արդյունավետ է (առավել մանրամասն նկարագրություն կարող եք գտնել ձեռնարկում [8]): Մեկ անգամ ևս ուզում ենք նշել, որ ներկայացված յուրաքանչյուր դասի պլանն առանձին կրում է կողմնորոշիչ բնույթ: Դրանք կազմված են՝ հաշվի առնելով կոնկրետ դասարանի առանձնահատկությունները և որոշ կարողությունների մակարդակը:

1. Անկյուններ

«Անկյունները» համագործակցային ուսումնառության մեթոդներից է, որի նպատակը բանավեճ ծավալելու և խմբային աշխատանքի միջոցով կառուցողական եզրակացությունների ձևավորումն է: «Անկյունները» կարող են դառնալ երկու և ավելի տեսակետներ հարուցող, հակասական հարցերի շուրջ ծավալվող բանավեճերի կառավարման գվարճալի և ակտիվ միջոց: Դասի ընթացքում դրանով կարելի է շարունակել տեքստի ընթերցումը, դասախոսությունը, ֆիլմի դիտումը, դասի ամփոփումը կամ աշակերտներին հետաքրքրող որևէ թեմայի քննարկումը:

«Անկյունների» քայլերը պարզ են: Դրանց իմաստն այն է, որ աշակերտները խնդրի վերաբերյալ ունենան իրենց դիրքորոշումը և կարողանան այն հիմնավորել ու պաշտպանել: Այս մեթոդն աշակերտներին մղում է լսելու դիմացինի մտքերն ու փաստարկները և, նրանց տրամաբանությունն ընդունելու դեպքում, փոփոխելու սեփական պատկերացումը կամ մեկ անգամ ևս համոզվելու, որ նրանց կարծիքը ճիշտ է:

Քայլ 1. Թեման կամ խնդիրն ընտրելուց հետո աշակերտներին պետք է բացատրել, որ նրանցից պահանջվում է խորհել այդ թեմայի շուրջ և ունենալ նախնական տեսակետ:

Քայլ 2. Պետք է որոշել, թե մասնակիցները կոնկրետ ինչ տեսակետ կարող են ունենալ տվյալ խնդրի վերաբերյալ: Անհրաժեշտ է աշակերտներին առաջարկել տեսակետների երկու-երեք տարբերակ: Ուսուցիչը կարող է տեսակետները սահմանել նախօրոք, կարելի է նաև աշակերտների հետ մտավոր գրոհի միջոցով հանգել մի քանի տեսակետների:

Քայլ 3. Հինգ րոպեի ընթացքում ձևակերպել գրավոր հիմնավորում սեփական տեսակետի օգտին: - Հիմնավորումը պետք է լինի համոզիչ ու հետևողական:

Քայլ 4. Գրառումն ավարտելուց հետո, «կողմ» տեսակետ ունեցող աշակերտներին հավաքել սենյակի մի անկյունում, իսկ «դեմ» տեսակետ ունեցող աշակերտներին՝ մյուս անկյունում: Տեսակետ չունեցող աշակերտները պետք է զբաղեցնեն սենյակի երրորդ անկյունը: Այլ տեսակետներ ձևավորվելու դեպքում, դրանց կողմնակիցները նույնպես պետք է իրենց տեղն ունենան:

Քայլ 5. Յուրաքանչյուր խմբի աշակերտները պետք է միմյանց հետ փոխանակեն իրենց հիմնավորումները, քննարկեն և ընտրեն իրենց տեսակետն ամրապնդող համոզիչ փաստարկներ (մոտ 5 թույլ)։ - Յուրաքանչյուր խումբ պետք է ընտրի խոսնակների, ովքեր խմբի կարծիքը պետք է ներկայացնեն ծավալվող բանավեճի ընթացքում։

Քայլ 6. Բանավեճը կարելի է սկսել՝ խնդրելով խմբերից մեկի խոսնակին, որ հստակ ներկայացնի իրենց տեսակետը, լավագույն հիմնավորումները։ Մյուս խմբերը նույնպես ներկայացնում են իրենց աշխատանքները։

Քայլ 7. Խոսնակները, երբ ավարտեն բանավեճի «պաշտոնական» մասը, խմբերի մյուս անդամներին նույնպես կարելի է ներգրավել քննարկմանը։ Օգնության կարիք ունեցող խմբին առաջարկեք մի քանի խրախուսող հարցեր, օրինակ՝

1. Ինչո՞ւ դուք՝ «Ա» խմբի աշակերտներդ, չեք ընդունում «Բ» խմբի կարծիքը։
2. «Բ» խմբի տեսակետի հատկապես ո՞ր մասի հետ համաձայն չեք։
3. Արդյո՞ք այստեղ հնչած փաստարկներն ստիպեցին ձեզ ընդունել այս կամ այն հստակ տեսակետը։
4. Ինչո՞ւ «Բ» խմբի անդամների համար «Ա» խմբի փաստարկները համոզիչ չեն։

Քայլ 8. Սովորողներին պետք է բացատրել, որ քննարկման ընթացքում կարող են փոխել իրենց կարծիքը նաև խումբը։ Դրա համար նրանք նախկին համախոհների խմբից պետք է տեղափոխվեն այն խումբ, որի տեսակետն ավելի համոզիչ է։

Քայլ 9. Քննարկումն ավարտելուց ու խմբերում վերջնական տեղ գրավելուց հետո, խնդրեք յուրաքանչյուր խմբին, որ ձևակերպեն սեփական տեսակետը և ամփոփեն հիմնավորումները։

2. Մտազրոհ (մտքերի տարափ)

«Մտքերի տարափը» կամ «Մտազրոհը» խմբային (թիմային) աշխատանքի պարզագույն, բայց շատ արդյունավետ մեթոդներից է։ Դրա նպատակը մտքերի վերարտադրումն է, երբ պարզապես խրախուսվում են ուսումնասիրվող նյութի հետ այս կամ այն կերպ առնչվող բառեր թվարկելն ու գաղափարներ արտահայտելը։ «Մտքերի տարափ» մեթոդը կիրառելիս արտահայտված բոլոր մտքերն ու գաղափարներն ընդունելի են, «սխալ» չկա։

Քայլ 1. Ուսուցիչը թեման, խնդիրը ձևակերպում է բանավոր, հրահանգի ձևով կամ որպես վերնագիր գրում է գրատախտակին ու խնդրում աշակերտներին կարծիք հայտնել դրա վերաբերյալ։

Քայլ 2. Աշակերտները մտքերը, գաղափարները, տեսակետներն ազատորեն արտահայտում են։ Արտահայտված բոլոր մտքերը գրանցվում են, այնուհետև հավաքագրվում են՝ ի տես բոլորին։

Խմբային աշխատանքի ժամանակ յուրաքանչյուր խումբ ինքն է ընտրում գրառման ձևը՝

- պարզապես թվարկմամբ գրանցել,
- առանց վերլուծության, խմբավորել գրանցումները թղթի տարբեր անկյուններում,
- կենտրոնում գրել խնդիրը, թեման, ապա դրա շուրջը շրջանաձև գրել՝ «Հավաքել արտահայտված մտքերը» և այլն։

Մեթոդը, եթե կիրառվում է ամբողջ դասարանի մասնակցությամբ, ապա գրանցումները գրատախտակին կամ թղթի վրա կարող է կատարել ուսուցիչը կամ աշակերտներից մեկը (մի քանիսը)։ Դասարա-

նը, եթե բաժանված է համագործակցային խմբերի, անհրաժեշտ է խմբերից յուրաքանչյուրին հիշեցնել, որ թիմակիցներից մեկին հանձնարարվելու է գրանցել բոլոր մտքերը: Աշխատանքն ավարտելուց հետո մեկ այլ մասնակից պետք է գրառումները ներկայացնի ամբողջ դասարանին: Խմբերի գրառումներն ընթերցում են բոլորի համար, գրանցումներով թղթերը փակցնում են լսարանում՝ մինչև դրանց վերլուծությանն անցնելը:

Քայլ 3. Այս կամ այն մեթոդն օգտագործելով, ուսուցիչն ուսուցանում է թեման աշակերտներին:

Քայլ 4. Անդրադարձ է կատարվում մտազրոհի արդյունքներին՝ ճշգրտելով, ուղղելով, լրացնելով, ամբողջացնելով նախնական մտքերի ու գաղափարների ցանկը:

3. Հասկացությունների քարտեզ

«Հասկացությունների քարտեզ» կոչվող այս հնարը մասնագիտական գրականության մեջ հաճախ կոչվում է նաև «գաղափարների քարտեզ» կամ «հասկացությունների քարտեզագրում»:

Քայլ 1. Շրջանի մեջ վերցրե՛ք թեման, գաղափարը կամ հասկացությունը, օրինակ՝ «Ներքին էներգիայի փոփոխման եղանակները»:

Քայլ 2. Այդ հասկացության շուրջ գրի՛ առեք ուղեկից բառեր, օրինակ՝ «աշխատանք», «ջերմահաղորդականություն»:

Քայլ 3. Քարտեզի «ճյուղերը» տարածվում են նաև յուրաքանչյուր ուղեկից բառից բխելով: Ճյուղավորումների քանակն ու բազմազանությունը կախված են նյութի ուսումնասիրման խորությունից, հետաքրքրությունների շրջանակից: Յուրաքանչյուր բառ սլաքով միանում է «ծնող բառին», իսկ միևնույն «ծնողն» ունեցող բառերը վերցվում են մի շրջանակի մեջ՝ որպես ուսումնասիրման մեկ ոլորտ:

Քարտեզագրման ընթացքում առավելագույն բազմաճյուղ պատկեր ստանալուց հետո, սովորողներին հանձնարարվում է պայմանական նշաններ օգտագործել, ինչպես ընդունված է յուրաքանչյուր քարտեզ կազմելիս: Ընտրում են որևէ նշան ու դրանով ընդգծում են այն գաղափարները, որոնց մասին անհրաժեշտ է լրացուցիչ տեղեկատվություն հավաքել: Խոշոր հարցական նշաններ են դրվում այն գաղափարների մոտ, որոնք անհրաժեշտ է ճշգրտել: Մեկ այլ նշան է դրվում այն բառերի կամ հասկացությունների մոտ, որոնց ուսումնասիրությունը բավարար կամ ավարտված են համարում: Որոշ այլ նշաններով առանձնացվում են հատուկ հետաքրքրության արժանի գաղափարները: Նշանների կիրառմանը կարելի է ստեղծագործաբար մոտենալ: Կարևորն այն է, որ արդյունքում ստացվի մի պատկեր, որին հաջորդի ուղղակի գաղափարների նպատակային ուսումնասիրությունը:

«Հասկացությունների քարտեզ» մեթոդն օգտակար է դասի խթանման ու կշռադատման փուլում: Խթանման փուլում մեթոդն օգտագործելիս, ուսուցչի օգնությամբ, որևէ նշանով կարելի է նշել այն գաղափարները, որոնք արդեն ուսումնասիրվել են, մեկ այլ նշանով՝ հետագա դասերի ընթացքում ուսումնասիրման ենթակա գաղափարները: Կշռադատման փուլում քարտեզի ձևով կարելի է ամփոփել բոլոր այն գաղափարները, որոնք ուսումնասիրվել են տվյալ դասի ընթացքում կամ ամբողջ թեմայի շրջանակներում: Օրինակ, «Ներքին էներգիայի փոփոխման եղանակները» թեման ուսումնասիրելիս առաջին իսկ դասին կարելի է ներկայացնել նկարում պատկերված քարտեզը՝ հարցական նշանով նշելով այն եղա-

նակները, որոնք տվյալ դասին չեն ուսումնասիրվելու: Կարելի է առանց քարտեզի ուսումնասիրել բոլոր եղանակներն ու կշռադատման ժամանակ ամբողջ ուսումնասիրված նյութն ամփոփել քարտեզի ձևով:

4. Խմբավորում

«Խմբավորումն» ուսումնական այն մեթոդներից է, որ հնարավորություն է տալիս երեխաներին ազատ մտածելու որևէ թեմայի շուրջ: Այն պետք է ունենա լայն կառուցվածք, որպեսզի մղի մտածելու գաղափարների միջև գոյություն ունեցող կապերի մասին: Մեթոդը մտածողության ոչ գծային ձև է և առավել մոտ է մեր մտքի բնականոն աշխատանքին: Խմբավորումը ոչ գծային մտավոր գրոհի մեթոդ է՝ նախատեսված փոքր խմբերի համար:

Քայլ 1. Գրե՛ք առանցքային բառը թղթի կամ գրատախտակի կենտրոնում:

Քայլ 2. Սկսե՛ք գրել ընտրած թեմային առնչվող բառերն ու արտահայտությունները:

Քայլ 3. Գաղափարներ գրելուց հետո, գծիկներով միացրե՛ք այն բառերը, որոնք, ձեր կարծիքով, իրար առնչվում են:

Քայլ 4. Հնարավորինս շատ մտքեր գրե՛ք, մինչև դրանք կամ ժամանակը սպառվեն:

Սովորողներին պետք է ցուցումներ տալ աշխատանքի մասին, օրինակ՝

«Գրի՛ առեք ձեր առաջին իսկ մտքերն ու գաղափարները: Մի՛ դատեք դրանց ճիշտ կամ սխալ լինելու մասին, պարզապես գրեք»:

«Մի՛ անհանգստացեք ուղղագրության կամ կետադրության կանոնների ճիշտ կիրառման մասին»:

«Մի՛ դադարեք գրել, քանի դեռ մտածում եք: Եթե մի պահ գաղափարների հոսքը դադարի, այնքան խզե՛ք թղթին, մինչև նոր մտքեր ծագեն»:

«Միացման գծիկ օգտագործեք: Մի՛ սահմանափակեք ձեր մտքերը»:

5. Փոխգործուն նշանների (գրառումների) համակարգ

Նոր, անծանոթ նյութի հետ աշխատելու հմտություն ձեռք բերելու նպատակով շատ օգտակար է կիրառել փոխգործուն նշանների համակարգը (ՓԳՆՀ):

Քայլ 1. Երեխաներին պետք է նախապատրաստել դասագրքի կամ որևէ այլ նյութ կարդալու, ծանոթացնել ՓԳՆՀ, որից երեխաները պետք է օգտվեն ընթերցելիս:

ՓԳՆՀ-ն հետևյալն է՝

«+» նշանը դրվում է, երբ այն, ինչ կարդում եք, նորություն է (չգիտեք):

«V» նշանը դրվում է, երբ այն, ինչ կարդում եք, հաստատում է իմացածը, ծանոթ է (գիտեք):

«-» նշանը դրվում է, երբ այն, ինչ կարդում եք, հակասում է ձեր նախնական գիտելիքներին այդ բնագավառում:

«?» նշանը դրվում է, երբ այն, ինչ կարդում եք, անհասկանալի է կամ դուք ցանկանում եք ստանալ ավելի խորը գիտելիք այդ հարցի վերաբերյալ:

«!» նշանը դրվում է, երբ այն, ինչ կարդում եք, հետաքրքիր է, կարելի է քննարկել:

Կարդալու ընթացքում երեխաները պետք է տեղադրեն այդ նշանները՝ ըստ նյութի իմացության ու պատկերացման: Այդ նշանների օգնությամբ երեխան պետք է կարողանա ընդհանուր առմամբ ներկայացնել իր պատկերացումը տվյալ նյութի մասին: Ի վերջո կարող է լինել այնպես, որ յուրաքանչյուր պարբերության մոտ աշակերտը դնի մեկ կամ երկու նշան, երբեմն՝ շատ, երբեմն՝ քիչ: Աշակերտներին պետք է բացատրել, որ ընթերցման ընթացքում պարտադիր չէ նշան դնել յուրաքանչյուր պարբերության կամ մտքի մոտ:

Քայլ 2. Երեխաները, նշանները դնելով, կարդում են տեքստը:

Քայլ 3. Երեխաներին պետք է հանձնարարել հետևյալ աղյուսակը լրացնել:

+	-	?	v

Նրանք պետք է համառոտ ներկայացնեն այն մտքերը, որոնք առանձնացրել են որևէ նշանով: Այսինքն՝ երեխաներն աղյուսակը լրացնելու համար ստիպված կլինեն նորից կարդալ տեքստը, վերանայել իրենց վերաբերմունքը դրված նշանի մասին:

Քայլ 4. Առաջարկեք երեխաներին, որ յուրաքանչյուրն իր կողքի աշակերտի հետ համեմատի աղյուսակները: Հավանական է, որ նրանցից մեկին հասկանալի միտքն անհասկանալի լինի մյուսին: Նրանք պետք է միմյանց բացատրեն նյութը:

Այս աշխատանքը կատարելուց հետո, եթե երեխաները հարցեր ունենան կամ անհասկանալի մտքերի առկայության դեպքում, ուսուցիչը պետք է պատրաստ լինի դրանք պարզաբանելու և բացատրելու: Նա անհասկանալի հարցերի վերաբերյալ պետք է հանձնարարի տնային առաջադրանք, որպեսզի ուսումնասիրեն նյութը՝ օգտագործելով լրացուցիչ գրականություն: Հետևաբար, ակտիվ մասնակցելով քննարկումներին ու ճիշտ կատարելով աշխատանքը դասարանում, յուրաքանչյուր աշակերտ կպարզաբանի այն ամենը, ինչը կապված է տվյալ դասի թեմայի հետ:

Քայլ 5. Բավարար ժամանակ ունենալու դեպքում, կարելի է հանձնարարել երեխաներին գրել մի կարճ շարադրություն թեմայի վերաբերյալ՝ օգտագործելով նոր գիտելիքները: Աշակերտների քննարկումից հետո, շարադրություններից մի քանիսը կարելի է կարդալ ամբողջ դասարանի համար կամ ուղղակի բանավոր ամփոփել:

6. Խճանկար

Ծրագրի նյութում, եթե կան իրար հետևից ընթացող այնպիսի թեմաներ, որոնք իմաստային կապ չունեն, օգտակար է աշխատել «Խճանկար» (Ջիքսո) մեթոդով: Շատ հարմար է գործածել ինտեգրված դասընթացներում: Հատկապես նպատակահարմար է այս մեթոդը կիրառել ծավալուն փաստերով ու տվյալներով հագեցած նյութերի հետ աշխատելիս:

«Խճանկարը» հիմնականում դասի իմաստի ընկալման փուլի մեթոդ է, որը ներառում է նաև կշռադատման փուլը:

Քայլ 1. Երեխաներին տրվում է 4 մասի բաժանված տեքստ (մասերի քանակը կարելի է հարմարեցնել՝ ըստ իմաստի անհրաժեշտության), նրանք պետք է արագ կարդան այն: Ակնհայտ է, որ երեխաները

կունենան հարցեր, կցանկանան արտահայտվել և այլն: Ցանկալի է անցկացնել քննարկում, կարևոր է, որ երեխաները լինեն անկեղծ, անկաշկանդ, չմտածեն գնահատականի մասին:

Քայլ 2. Դասարանը բաժանել 4 խմբի (տեքստի իրար չկապակցված մասերին համապատասխան, օրինակ՝ A, B, C, D): Յուրաքանչյուր խմբում առաջարկել երեխաներին հաշվել 1-4-ը՝ հիշելով նախկին խմբի տառը՝ A, B, C կամ D:

Քայլ 3. A, B, C և D խմբերի 1-ին համարներն ստեղծում են մի նոր՝ 1* խումբ, որը պիտի ուսումնասիրի տեքստի առաջին հատվածը (մասը), երկրորդ համարները՝ 2* խումբ, որը պիտի ուսումնասիրի տեքստի երկրորդ հատվածը (մասը) և այլն:

Երեխաներին անհրաժեշտ է բացատրել, որ պետք է ուսումնասիրեն տեքստի միայն իրենց խմբին հանձնարարված հատվածը, կարդան շատ ուշադիր, մանրամասն ուսումնասիրեն այն: Թե ինչպե՞ս դա պետք է արվի, որոշելու են իրենք 1*, 2*, 3* և 4* խմբերում: Երեխաներին պետք է զգուշացնել նաև, որ պատասխանատվությամբ վերաբերվեն սովորած նյութին, քանի որ այդ նյութը նրանք պետք է սովորեցնեն A, B, C և D խմբերի իրենց ընկերներին:

Աշխատանքի ընթացքում ուսուցիչը հետևում է երեխաների աշխատանքին, միայն անհրաժեշտության դեպքում, միջամտում է, տալիս որոշ խորհուրդներ:

Քայլ 4. Որոշ ժամանակ հետո աշակերտները 1*, 2*, 3* և 4* խմբերից վերադառնում են իրենց առաջնային A, B, C և D խմբերը (այդ մասին երեխաներին նախօրոք զգուշացնում են, դրա տևողությունը կախված է դասի տևողությունից և նյութի ծավալից):

Քայլ 5. Ստացվում է այնպես, որ յուրաքանչյուր A, B, C և D խմբում հավաքվում են այն աշակերտները, ովքեր ուսումնասիրել են և պատրաստ են սովորեցնելու նյութի իրենց մասը խմբի մյուս անդամներին: Խմբի յուրաքանչյուր աշակերտ ներկայացնում է նյութի իր մասը խմբի մյուս աշակերտներին: Ի վերջո ստացվում է այնպես, որ դասարանի յուրաքանչյուր աշակերտ յուրացնում է ամբողջ նյութը՝ ծախսելով նվազագույն ժամանակ: Այս մեթոդով յուրացրած գիտելիքները կարելի է գնահատել խմբերով, խմբի ներսում գրավոր աշխատանքի, հարցման միջոցով:

Առաջին քայլը կարելի է անցկացնել՝ օգտագործելով նյութի վերաբերյալ նկարներ: Մասնավորապես, աշակերտներին հանձնարարվում է 3-5 ռուպեի ընթացքում գրել կարճ շարադրություն՝ նկարում պատկերվածի վերաբերյալ կամ ավելի ընդհանուր՝ «Ի՞նչ գիտեք դրա մասին» վերնագրով: Դասի կշռադատման փուլում աշակերտները կարող են համեմատել իրենց նախնական գիտելիքները դասի ընթացքում ստացած գիտելիքների հետ:

7. Քառաբաժան

Հետաքրքիր մեթոդական հնարք է, որը հարմար է ինչպես դասն ամփոփելու, այնպես էլ խթանման համար: Քառաբաժանը նույնպես կարելի է կիրառել մեծ ու փոքր խմբերով կամ անհատական աշխատանք կատարելիս:

Քայլ 1. Աշխատանքն սկսելու համար անհրաժեշտ է մաքուր թուղթ կամ գրատախտակ, որը պետք է բաժանել չորս մասի:

Քայլ 2. Յուրաքանչյուր մասում գրվում է հարց կամ հանձնարարություն: Աշակերտները դրանք պետք է կատարեն միայնակ կամ խմբով: Հարցերի և առաջադրանքների բովանդակությունը խիստ պայմանավորված է այն բանով, թե դասի որ փուլում է կատարվելու:

Ստորև ներկայացված է քառաբաժան աղյուսակի երկու ձև: Բաժինների հանձնարարությունները պատահական չեն ընտրված, դրանք համապատասխանում են մտքի զարգացման ընթացքին: Իհարկե, կարելի է դրանք զարգացնել՝ նկատի ունենալով ընկալման ու մտածողության մակարդակները, օրինակ՝ ըստ Բլումի դասակարգման:

Թվարկե՛ք բնական գիտություններից մի քանիսը:	Ի՞նչ է բնությունը, բնության երևույթը:
Բերե՛ք ֆիզիկական մարմինների օրինակներ:	Բերե՛ք ֆիզիկական երևույթների օրինակներ:
Առօրյա կյանքում ձեզ հայտնի ի՞նչ երևույթներ են հիշեցնում արքիմեդյան ուժի գոյությունը:	Ջրի տակ գտնվելով, մարդն ինչո՞ւ է երբեմն հեշտությամբ գետնից կտրում ու բարձրացնում առարկան, որն օդում հագիվ է պահում:
Երկու ի՞նչ ուժեր են ազդում հեղուկի կամ գազի մեջ գտնվող յուրաքանչյուր մարմնի վրա:	Ո՞րն է մարմնի վրա ազդող արքիմեդյան ուժի առաջացման պատճառը:

Անհատական աշխատանքի դեպքում զույգերն իրենց գրառումները ներկայացնում են միմյանց, ապա՝ դասարանին: Հնարավոր է՝ ըստ ուսումնասիրվող նյութի, կարևորվի տեքստի, պատմվածքի կամ նյութի դիտարկումը որևէ տեսանկյունից, ինչը կնպաստի, որպեսզի հատկապես ուշադրություն դարձվի քառաբաժնի այս կամ այն հատվածի գրառումների վրա, որոնք պետք է առանձնացնել, բացատրել ու քննարկել:

8. Ապագայի անիվ

Պատճառահետևանքային կապերը վեր հանելու համար շատ օգտակար է «Ապագայի անիվ» մեթոդը:


Քայլ 1. Պատկերե՛ք ուղղահայաց ուղիղներ: Ուղղաձիգ վեր ուղղված սլաքի մոտ գրեք «ապագա» (հետևանք), իսկ ներքև ուղղվածի վրա՝ «անցյալ» (պատճառ):

Քայլ 2. Հորիզոնական ուղղի կենտրոնական մասում նշե՛ք քննարկման ենթակա երևույթը, հասկացությունը և այլն:

Քայլ 3. Դեպի վեր ուղղված սլաքներ գծե՛ք և յուրաքանչյուր սլաքի մոտ նշե՛ք օղակ, որի ներսում գրվում է հետևանքը: Այդ օղակից ևս կարող են դուրս գալ սլաքներ և այդպես հիմնախնդրի ճյուղավորումը գնա դեպի ապագա:

Քայլ 4. Դեպի ներքև ուղղված գծեր ենք տանում և յուրաքանչյուր գծի մոտ նշում ենք օղակ, որի ներսում գրվում է պատճառը: Այդ օղակից ևս կարող են դուրս գալ գծեր և այդպես հիմնախնդրի ճյուղավորումը գնա դեպի անցյալ: Սլաքներն ուղղում ենք դեպի վեր:

Քայլ 5. Արդյունքում ստացվում է նկարում պատկերված տեսքը:



9. Ձևակույտ

Դասի ընթացքում, եթե սովորողների կարծիքների փոխանակման, ընտրության, հավաքման ու գաղափարներ կազմելու կարիք կա, հարմար է աշխատել «Ձևակույտ» («Ձևագնդի») մեթոդով:

Քայլ 1. Ուսուցիչն աշակերտներին ներկայացնում է ինչ-որ պատմություն կամ առաջադրանք:

Քայլ 2. Ի՞նչ միտք է ծագում առաջին հերթին: Գրե՛ք ձեր գաղափարների (կարծիքների) ցանկն այս պատմության կամ առաջադրանքի վերաբերյալ (4 թուպե), (անհատական աշխատանք):

Քայլ 3. Կազմե՛ք զույգեր և մեկմեկու ներկայացրե՛ք ձեր անձնական կարծիքը: Հետո միասին ձևակերպեք երկուսիդ համար ընդհանուր 3-5 կարծիք, որ ընտրել եք ձեր կարծիքների ցանկից: Գրե՛ք դրանք թղթի վրա (6 թուպե):

Քայլ 4. Կազմե՛ք 4 հոգանոց խմբեր: Ներկայացրե՛ք զույգերով կազմած կարծիքները, նորից ձևակերպեք 4 ընդհանուր կարծիքներ՝ ամբողջ խմբի համար: Խումբը գրում է դրանք առանձին թղթի վրա (8 թուպե):

Քայլ 5. Երկուական 4 հոգանոց խմբերը միանում են և կազմում 8 հոգանոց մեծ խմբեր: Յուրաքանչյուր խումբ ներկայացնում է իր կարծիքը, պարզում նմանություններն ու տարբերությունները (ընթացքում նրանք կարող են ավելացնել նաև նոր կարծիքներ): Նորից ձևակերպեք 4 ընդհանուր կարծիք՝ ամբողջ խմբի անունից:

Քայլ 6. Խմբերի ձևակերպած բոլոր կարծիքները ներկայացրե՛ք դասարանին:

10. Գիտեմ-ուզում եմ սովորել-սովորեցի աղյուսակը (ԳՈՒՍ)

Քայլ 1. Ուսուցիչը դասարանում հայտարարում է դասի թեման և առաջարկում է երեխաներին վերհիշել գիտեցածն այդ մասին: Քննարկումից հետո ուսուցիչը հարցնում է, թե թեմայի վերաբերյալ ի՞նչ հարցեր ունեն աշակերտները կամ ի՞նչ կուզեին իմանալ: Այս հարցի շուրջ քննարկում վարելիս ուսուցիչն իր վարպետությամբ պիտի կարողանա երեխաների քննարկումն ավարտել դասի թեմայի վերաբերյալ հարցերով:

Քայլ 2. Քննարկումն ավարտելուց հետո երեխաներին հանձնարարվում է լրացնել հետևյալ աղյուսակի 1-ին և 2-րդ սյունակները: Կարելի է առաջարկել այդ աշխատանքը կատարել զույգերով՝ դասասեղանի ընկերոջ կամ, սկզբնական շրջանում, ուսուցչի օգնությամբ:

Գիտեմ	Ուզում եմ սովորել (իմանալ)	Սովորեցի, իմացա

Քայլ 3. Երեխաները, երբ ձևակերպեն իրենց մտքերը և գրի առնեն այն, ինչ գիտեն և ինչ են ուզում իմանալ, ուսուցիչը պետք է բացատրի նոր դասը կամ հանձնարարի ուսումնասիրել դասագրքի համապատասխան պարագրաֆը: Այդ ընթացքում, եթե երեխաները հարցեր են ունենում, ապա ուսուցիչը պարզաբանում է:

Քայլ 4. Առաջարկեք աշակերտներին գտնել այն տեղեկությունները, որոնք պատասխանում են իրենց հարցերին կամ լրացնում դրանք՝ ընդլայնելով թեմայի մասին պատկերացումները:

Քայլ 5. Աշակերտները, երբ վերջացնեն կարդալը, նրանց ուշադրությունը հրավիրե՛ք աղյուսակի երրորդ սյունակին՝ «սովորեցի»: Առաջարկե՛ք թվարկել այն նոր տեղեկությունները, որոնք ստացել են կարդալու կամ դասը լսելու ընթացքում և գրի առնել տետրերում:

11. Կարուսել

«Կարուսել» մեթոդը լավ է աշխատում, երբ մեկ դասի ընթացքում անհրաժեշտ է քննարկել մի քանի խնդիրներ ու հարցեր:

Քայլ 1. Ուսուցիչը հայտարարում է դասի թեման, տալիս փոքր ներածություն, ներկայացնում քննարկման հարցերը (խնդիրները): Կարելի է հարցերը գրել գրատախտակի կամ մեծ պաստառների վրա:

Քայլ 2. Դասարանը բաժանվում է խմբերի՝ հարցերի քանակի համապատասխան: Յուրաքանչյուր խմբին հանձնարարվում է խնդիր (հարց) կամ տրվում է պաստառ և առաջարկվում ձևակերպել դրա վրա գրված հարցի պատասխանը:

Քայլ 3. Խմբում հարցը քննարկվում է, աշակերտները գալիս են ընդհանուր հայտարարի և գրում հիմնավորված պատասխան (լուծումը)՝ մեկնաբանություններով:


Քայլ 4. Ուսուցիչը կատարում է պաստառների շրջափոխություն: Խմբերից յուրաքանչյուրն ստանում է նոր պաստառ, որի վրա նախորդ խումբն արդեն գրել էր պատասխանի իր տարբերակը:

Քայլ 5. Քննարկումից հետո նոր խումբը գրում է պատասխանի իր տարբերակը, եթե համարում է առաջին պատասխանը սխալ կա՛մ կատարում է լրացումներ, դիտողություններ և այլն, կա՛մ գրում է, որ լիովին համաձայն է պատասխանի հետ:

Աշխատանքի ընթացքում պետք է այնքան շրջափոխություն կատարել, որքան խնդիր կամ հարց է նախատեսված: Վերջ ի վերջո յուրաքանչյուր խումբ ստանում է իր սկզբնական պաստառը՝ համադասարանցիների դիտողություններով: Դիտողությունների ուշադիր ուսումնասիրությունից հետո, նրանք կարող են գրատախտակի մոտ բանավոր արտահայտել իրենց համաձայնությունը կամ անհամաձայնությունը: Անհրաժեշտության դեպքում, ուսուցիչը միջամտում է քննարկմանը:

12. Վենի դիագրամ

Վենի դիագրամը կառուցվում է երկու կամ ավելի շրջանաձև պատկերների միջոցով, որոնց կենտրոնում կա հատման մեծ մակերես: Այս դիագրամը կարելի է օգտագործել գաղափարները միմյանց հակադրելու կամ դրանց ընդհանրությունները ցույց տալու համար: Վենի դիագրամը, եթե փորձենք համեմատել T-աձև աղյուսակի հետ, ապա ակնհայտ կլինի, որ Վենի դիագրամով հստակ առանձնացվում ու կարևորվում են երկու (երեք ...) հասկացության ընդհանրությունները և շեշտվում յուրաքանչյուրին բնորոշ առանձնահատկությունները: Սա ևս միայնակ կամ խմբով (հաճախ ավելի արդյունավետ է զույգերով) կատարվող վարժություն է, որը տեղեկատվության մեծ ու մանրամասն պաշար չի պարունակում: - Կարևոր է հիշել, որ ընդհանրություններն ու առանձնահատկությունները նշելիս աշակերտներից պահանջվում է գրել ընդգրկուն ձևակերպումներ:



Վենի դիագրամը կարող է ունենալ ինչպես պարզ (երկու հասկացության համեմատության համար), այնպես էլ բարդ կառուցվածք (երեք-չորս հասկացության համեմատության համար): Տարբեր հասկացությունների այսպիսի վերլուծությունը հնարավորություն է ընձեռում առավել հստակ պատկերացնել ընդհանուր ու տարբերակող հատկությունները: Այն ունի կարևոր համակարգող դեր, օգտագործվում է դասի ամփոփիչ փուլերում՝ նյութի ընդհանրացման և ամփոփման նպատակով, կիրառելի է բոլոր առարկաների համար:

13. T-աձև աղյուսակ

T-աձև աղյուսակն օգտագործվում է միևնույն հասկացության երկու կողմը համեմատելու համար: Սա գծագրական դասակարգիչներից ամենապարզն է և՛ իր կազմակերպման ձևով, և՛ կառուցվածքով: Այն կարող է կիրառվել ինքնուրույն կամ խմբով աշխատելիս: Իր ձևով T տառը հիշեցնող աղյուսակը կազմված է երկու բաժնից, որտեղ գրանցվում են միևնույն հասկացության, խնդրի հակադիր որակները՝ դրական կամ բացասական կողմերը: Աղյուսակի այս ձևը շատ հարմար է քննարկումների ժամանակ երկու տարբեր պատասխանների (այո/ոչ, կողմ/դեմ) կամ համադրություն/հակադրություն արտահայտող արձագանքների գրառման համար: Օրինակ, աշակերտները կարող են անդրադառնալ T-աձև աղյուսակին, երբ պատրաստվում են ինքնուրույն կամ խմբով քննարկել իներցիայի կամ շփման երևույթների դրական ու բացասական կողմերը:

Դրական կողմեր	Բացասական կողմեր

T-աձև աղյուսակը ճկուն է նաև այն իմաստով, որ դրա օգտագործումն արդյունավետ է դասերի տարբեր փուլերի ընթացքում:

14. m-աձև աղյուսակ

m-աձև աղյուսակը կառուցվածքով T-աձև աղյուսակի մեկ այլ տարբերակն է, որը միևնույն հասկացության, խնդրի վերաբերյալ երեք տարբեր վերաբերմունք (դրական, բացասական, չեզոք) արտահայտելու հարմար միջոց է: Այն նույնպես կարող է կիրառվել ինքնուրույն կամ խմբով աշխատելիս: Սա երեք բաժնից կազմված աղյուսակ է, որտեղ գրանցվում են միևնույն հասկացության, խնդրի վերաբերյալ դրական, բացասական կամ չեզոք տեսակետները, բերվում են անհրաժեշտ փաստեր, տվյալներ ու հիմնավորումներ: Աղյուսակի այս ձևը շատ հարմար է քննարկումների ժամանակ երեք տարբեր պատասխանների (այո/ոչ/չգիտեմ, կողմ/դեմ/ձեռնպահ) կամ համադրություն/հակադրություն/չեզոք վերաբերմունք արտահայտող արձագանքների գրառման համար: Օրինակ, m-աձև աղյուսակը կարող է օգտագործվել ատոմային էներգիայի կիրառությունները քննարկելիս:

Դրական կողմեր	Չեզոք կողմեր	Բացասական կողմեր

m-աձև աղյուսակն արդյունավետ է դասերի տարբեր փուլերում թե՛ անհատական աշխատանքի, թե՛ խմբային քննարկումների ժամանակ:

15. Կրկնակի գրառումների օրագիր

«Կրկնակի գրառումներով օրագիր» մեթոդով շատ հարմար է աշխատել, երբ անհրաժեշտ է վերլուծել որևէ դիրքորոշում, կարծիք, խնդրի լուծման տարբերակ:

Քայլ 1. Աշակերտներին առաջարկել ուղղաձիգ գծով երկու մասի բաժանել տետրի էջը: Ձախ կողմում գրել տեքստից մի հատված կամ գաղափար, որը մեծ ազդեցություն է թողել իրենց վրա: Հավանաբար այն զարմացրել է նրանց կամ հուշել է, թե ինչ ո՞ճ կամ տեխնիկա է օգտագործել գրողը: Դրա համար տեքստը պետք է կարդալ դադարներով, առնվազն չորս գրառում անելով:

Քայլ 2. Ընթերցանությունից հետո գրի առաձը պետք է մեկնաբանել: Մի քանիսին, ըստ ցանկության, կարելի է առաջարկել միմյանց հետ կարծիքներ փոխանակել այն նույն հերթականությամբ, որը տեքստում է: Դրանից հետո նրանք պետք է աջ կողմում նշված հատվածի կամ կերպարի (գաղափարի) վերաբերյալ գրեն մեկնաբանություն, թե ինչի՞ մասին էր գրված հատվածը, ի՞նչը մտածելու տեղիք տվեց, տվյալ հատվածին առնչվող ի՞նչ հարցեր ունեն: Որևէ հատվածի վերաբերյալ մեկնաբանություն լսելիս անհրաժեշտ է տալ ստուգիչ հարցեր: Օրինակ՝

1. Ձեր կարծիքով, ինչո՞ւ հենց այդ հատվածը գրավեց ձեր ուշադրությունը: Ինչի՞ մասին ստիպեց մտածել:

2. Արդյո՞ք մյուսները նշել են այդ հատվածը, եթե այո, ապա առաջարկեք կարդալ այդ հատվածի մասին գրած մեկնաբանությունը բոլորի համար: Ուշադրություն դարձրեք մասնակիցների պատասխանների միջև նմանություններին ու տարբերություններին: Պարտադիր պետք է հետևել մեկնաբանություններին՝ տալով «ինչո՞ւ» հարցը: Վերջում պետք է նշել ձեր մեկնաբանություններից մեկը կամ երկուսը: Թող դրանք անձնական, այլ ոչ թե հեղինակային լինեն, քանի որ դուք ընթերցողներից մեկն եք: Ուսուցիչը նույնպես շարքային ընթերցող է դառնում, նրա մասնակցությունը պետք է խրախուսի, որպեսզի մյուսները խոսեն, այլ ոչ թե խուսափեն խոսելուց:

3. Տվեք մի քանի ընդհանրացված հարց: Քննարկումը պետք է բխի մասնակիցների անձնական մեկնաբանություններից, հատկապես, եթե դուք խրախուսում եք հայտնագործություն անելը և դրանք կապում եք այլ մասնակիցների մեկնաբանությունների հետ: Սովորաբար ընթերցվող տեքստի վերաբերյալ մի քանի «ընդհանրացված» հարցեր առաջարկելն օգնում է: Նման հարցերի առավելություններից մեկն այն է, որ դրանք աշակերտներին ստիպում են տեքստի մասին մտածել որպես ամբողջություն: Մեկ այլ առավելություն է այն, որ դուք ամեն անգամ կարող եք նույն հարցախումբն առաջադրել այնպես, որ աշակերտներն ակնկալեն այդ հարցերն ու տվյալ հարցերի մասին մտածելու ավելի շատ հմտություն ձեռք կբերեն: Հետևաբար, «կրկնակի գրառումների օրագրերն» ընթերցողների համար տեքստի նյութն իրենց հետաքրքրությունների և փորձի հետ կապելու միջոց են:

Ֆիզիկայի դասերին շատ արդյունավետ է աշխատել մի փոքր ձևափոխված օրագրով, որը հնարավորություն կտա զարգացնելու ինքնուրույն աշխատելու հմտությունը, վերլուծելու ինքնագնահատման կարողությունը: Ինքնուրույն խնդիրներ լուծելու և դրանք ինքնուրույն ստուգելու կարողությունը զարգացնելու համար նպատակահարմար է աշխատել ստորև բերված կարգով:

Քայլ 1. Կարդալ դասագրքի կամ խնդրագրքի որևէ խնդիր, պարզաբանել պայմանները, պահանջները:

Քայլ 2. Գրատախտակի վրա գծել աղյուսակ և առաջարկել լրացնել հետևյալ կերպ. առաջին սյունակում գրել խնդրի պայմանները, երկրորդում՝ լուծումը:

Աշխատում են ինքնուրույն: Ուսուցիչը շրջում է դասարանում, ուղղորդում է աշակերտների աշխատանքը: Անհրաժեշտ է պարտադրել, որ յուրաքանչյուր աշակերտ իր տետրում գրի խնդրի լուծումը՝ չվախենալով սխալներից ու ջնջումներից:

Տրված է (խնդրի պայմանները)	Լուծում	Ճիշտ լուծում

Քայլ 3. Աշակերտներից մեկին, ով ճիշտ է լուծել խնդիրը, կանչել գրատախտակի մոտ: Նա բացատրելով, պետք է գրատախտակի վրա գրի խնդրի ճիշտ լուծումը:

Քայլ 4. Ուսուցչի մեկնաբանություններից հետո, աշակերտները պիտի լրացնեն աղյուսակի երրորդ սյունակը՝ գրելով խնդրի ճիշտ լուծումը, եթե իրենց գրածը ճիշտ չէ, ապա վերլուծելով պետք է գտնեն իրենց սխալը:

Նման ձևով կարելի է անցկացնել խնդիրների լուծմանը նվիրված որևէ դաս: Շատ կարևոր է, որ աշակերտը պարտադիր փորձի լուծել, նույնիսկ, եթե գրի միայն ելակետային հավասարումները կամ ճիշտ ներկայացնի խնդրի պայմանները, գծագիրը: Նրան ոչ ոք չի ասում, որ նա սխալ է, ինքն է համոզվում և իր սխալն ուղղում է:

16. Ուղղորդված ընթերցանություն

Մտածողության այլ մակարդակի զարգացմանն է նպաստում «Ուղղորդված ընթերցանություն» մեթոդը:

Քայլ 1. Գրատախտակին գրում են նոր նյութին վերաբերող որոշ կարևոր հարցեր:

Քայլ 2. Նշված հարցերին պատասխանելու նպատակով երեխաները կարդում են դասագրքի համապատասխան պարագրաֆը:

Քայլ 3. Տեսրերում գրում են հարցերի պատասխանները: Աշխատում են ինքնուրույն կամ զույգերով: Ուսուցիչը շրջում է դասարանում, ուղղորդում է աշակերտների աշխատանքը:

Քայլ 4. Աշխատանքն ավարտելուց հետո, բոլոր հարցերի պատասխանները հստակեցնում են ամբողջ դասարանի ջանքերով:

17. Փոխադարձ բացատրություն

Քայլ 1. Զույգին տրվում է երկու կապակցված տեքստ (դասագրքի նյութերից)՝ դեռևս չբացատրված թեմաների վերաբերյալ: Դա կարող է լինել միևնույն թեմային վերաբերող երկու տեսակետ ներկայացնող տեքստ):

Քայլ 2. Յուրաքանչյուր աշակերտ ուսումնասիրում է իր մասը:

Քայլ 3. Յուրաքանչյուր աշակերտ բացատրում է իր թեման մյուսին, ով, իր հերթին, հարցեր է տալիս մինչև հասկանալը: Գրում են իրենց ուսումնասիրած մասը, պարզաբանում առաջացած հարցերը:

Քայլ 4. Միասին կատարում են առաջադրանք կամ լուծում խնդիր, որը վերաբերվում է երկու տեքստի բովանդակությանը:

18. Վերնագրեր

Քայլ 1. Սովորողներին հանձնարարվում է ուսումնասիրել դասագրքի որևէ պարագրաֆ:

Քայլ 2. Սովորողները պետք է բաժանեն տեքստն այնպիսի մասերի, որոնք, իրենց կարծիքով, հնարավոր է վերնագրել: Վերնագիրը կարող է լինել մեկ բառ, մի քանի բառ, արտահայտություն, որն ամփոփում է տվյալ հատվածի միտքը, բովանդակությունը (կարելի է պատրաստի տեքստից ջնջել առկա վերնագրերը կամ հանձնարարել յուրաքանչյուր պարբերությունը վերնագրել): Կարելի է հանձնարարել հակառակ ձևով աշխատել, այսինքն՝ տալ վերնագրերը, իսկ հետո սովորողներին խնդրել յուրաքանչյուր վերնագրի վերաբերյալ ուսումնասիրություն կատարել ու հակիրճ շարադրանքով ներկայացնել այն: Այս մեթոդն ինքնուրույն ուսումնասիրության հրաշալի եղանակ է:

19. Առանցքային կետեր

Քայլ 1. Սովորողներն ստանում են անձանոթ տեքստ (դասագրքի պարագրաֆ):

Քայլ 2. Նրանց հանձնարարվում է մի քանի թույլ միայնակ կարդալ տեքստը:

Քայլ 3. Քննարկելուց հետո դասարանը որոշում է, թե քանի առանցքային կետ կարելի է առանձնացնել այդ տեքստի բովանդակությունից:

Քայլ 4. Սովորողները բաժանվում են խմբերի՝ ըստ առանցքային կետերի քանակի, ուշադիր ուսումնասիրում են: Յուրաքանչյուր խումբ, բացատրությամբ ու հիմնավորմամբ, ներկայացնում է առանցքային կետերից մեկը: Դասարանը համաձայնվում է կամ փոփոխություն է կատարում տվյալ կետի ձևակերպման մեջ, որից հետո ուսուցիչը գրում է այն գրատախտակին:

20. Որոշումներ

Քայլ 1. Ձույգերով աշխատող սովորողներին տրվում է տեքստ, ինչպես նաև «Ամփոփող քարտեր», որոնք ամփոփում են տեքստի գլխավոր կետերը, ընդ որում՝ դրանցից մի քանիսը ճիշտ են, մյուսները՝ սխալ: Հետո տրվում են «Հետևանքների» քարտեր, որոնք նշում են տեքստում ներկայացված փաստերի հետևանքները, սակայն հետևանքները տեքստում ներկայացված չեն: Դրանցից որոշները նույնպես ճիշտ են, մյուսները՝ սխալ:

Քայլ 2. Սովորողները զույգերով որոշում են, թե որ քարտերն են ճիշտ, իսկ սխալ քարտերում, մասնավորապես, ինչն է սխալ:

21. Տեքստի վերաբերյալ հարցադրումներ

Սովորողներին տրվում է անձանոթ տեքստ: Նրանց հանձնարարվում է զույգերով կամ փոքրիկ խմբերով ձևակերպել կարևոր հարցեր, որոնց պատասխաններն ակնկալվում է գտնել տեքստում: Այդ նպատակով իրականացնում են հետևյալ քայլերը:

Քայլ 1. Կարդալ տեքստը, ընդգծել գլխավոր կետերը:

Քայլ 2. Քննարկել գլխավոր կետերը: Ձևակերպել հարց, որի պատասխանը լինի գլխավոր կետի բովանդակությունը:

22. Դատավարություն

Քայլ 1. Առանձնացնել 3 ուժեղ աշակերտների: Մյուսներին բաժանել 2 հավասար խմբերի: Խմբի ներսում քննարկելուց հետո, հայտարարել խմբի-թիմի անվանումը և խմբի ավագի անունը:

Քայլ 2. Երկու մեծ խմբերի սովորողներին հանձնարարել պատրաստել 9-10 հարց՝ անցած նյութի վերաբերյալ:

Քայլ 3. Յուրաքանչյուր մեծ խմբի սովորողները հերթով կարդում են իրենց կազմած հարցերը, մյուս խմբի սովորողները պատասխանում են՝ խմբի ներսում քննարկելուց հետո:

Առանձնացված 3 հոգին դատավորներն են: Պատասխանը եթե սխալ է, ապա ուղղում են, տալիս են ճիշտ պատասխանը: Նրանք նաև որոշում են թիմերի ճիշտ ու սխալ պատասխանների քանակը: Ուսուցիչը կազմակերպում է այդ ամենը, հետևում ընթացքին, անհրաժեշտության դեպքում՝ միջամտում:

Քայլ 4. Ամփոփել, հայտարարել ընդհանուր հաշիվը և հաղթող թիմի անունը: